

BIG FOUR 開騷苦練絕技

勁過林峯 張衛健訂登練舞



■張衛健預告在演唱會上會有「光宗耀祖」的演出。



■林峯的椅子舞成為一時佳話。資料圖片

■左起：許志安、梁漢文、張衛健與蘇永康落力練舞。

BIG FOUR成員張衛健、許志安、蘇永康和梁漢文將於約兩星期後在紅館舉行演唱會，4子密鑼緊鼓綵排，蘇永康揚言會一齊表演樂器，必定帶驚喜給觀眾。梁漢文爆張衛健會表演蜈蚣彈和跳『林峯凳舞』，更指張衛健的動作幅度超越林峯。

將於8月9至11日在紅館舉行一連三場演唱會的BIG FOUR成員張衛健（Dicky）、許志安、蘇永康和梁漢文（Edmond），近日忙於綵排和練歌，誓以最佳狀態跟觀眾見面。Edmond笑言：「一定唔可以忘記有人要練蜈蚣彈同埋『林峯凳』……」眾人即追問Dicky練習進度如何？他說：「使唔使用2,000幾呎排舞室嚟練？你畀個廁所我練吓就得啦！」Edmond笑言：「你要做30幾下，成條沙甸魚咁，動作幅度大過林峯好多！」

安仔突然爆料：「聽講你訂造咗張凳！」Dicky笑言：「係訂咗張凳，但唔係姓林，係姓張。今次擔保鍾意BIG FOUR嘅朋友，即使以前睇過我哋表演，都一定

未見過我哋咁做，亦唔會諗到我哋會咁樣做。」並預告有大驚喜，叫大家上網撲飛，不過安仔和蘇永康笑言：「啲飛一早賣晒啦！」

建議許志安着旗袍唱歌

蘇永康說：「今次我哋4個會做一個樂器演出，大家花咗唔少時間排練。Dicky真係付出好大努力，事實上呢部分佢都好期待。」Dicky揚言：「係，光宗耀祖就靠呢一Part！」他們越練越Fit，問到會否騷肌派福利？安仔表示不一定性感，但造型必定特別。Dicky建議安仔着旗袍唱《喜歡你是你》，Edmond即說：「要開衩高到上腰！」

胡敏芝否認似薛凱琪

由陸永、C君與胡敏芝主持的TVB Plus節目《旅行最緊要近》今晚播出最後一集，3人來到惠州享受陽光與海灘。提到該處素有「中國馬爾代夫」之稱，C君說：「唔使話似唔似，惠州自己都幾正咩。好多民宿、酒店同Resort，好舒服。」他又指網民稱胡敏芝為「小薛凱琪」，胡敏芝卻不認同說：「因為薛凱琪靚太多喇，我諗啲網民講笑。」C君續指與陸永和胡敏芝非常合襯，零違和感：「似咩呢？似《魔戒》組合，樹人、哈比人加一隻精靈，個畫面好卡通。」令胡敏芝笑破肚皮。



■左起：陸永、胡敏芝與C君似《魔戒》組合。

關嘉敏挑戰性感極限

關嘉敏近日憑無綫戀愛綜藝節目《女神配對計劃》人氣急升，她於社交平台上載一輯靚照，挑戰性感極限，獲網民讚身形弗爆。她接受傳媒訪問時透露，因之前愛犬意外離世，才發覺與愛犬很少合照，故趁另一愛犬Two Two健康又活潑時，爭取機會影相。

關嘉敏說：「呢個Look唔係我諗，因為攝影師係寵物攝影，都想試下唔同造型。」她直言未試過穿如此性感的服飾，曾擔心走光：「但影嘅時候攝影師令我冇安全感，所以都好信任佢。我初初擔心影出嚟效果唔好，但係影咗幾張相後，見到出嚟個感覺唔會有低俗味道，所以之後都好放心，個效果都令我好滿意。」她更稱拍了很多靚相，將會陸續跟大家分享。



■關嘉敏攜愛犬影寫真。

楊天宇封最靚仔主廚

曾拍電影《怒火》、《金手指》和《海關戰線》等的楊天宇最近踩過界，參加廚藝PK真人騷。他坦言心情緊張又興奮：「以前煮嘢食純粹為開心，見到身邊人食得開心就夠。但依家會諗點樣將一碟餸做到極致，真係感受到廚師嘅壓力。」楊天宇參賽菜式「蝦蝦蝦麵」非常創新，他原本想用意大利粉，但覺得不夠原創，最後改用富香港特色的蝦子麵，再加蝦子及用蝦乾熬湯，鮮味爆燈。他煮食時的陽光笑容，成功俘虜現場一眾女生，更被網民封為「最靚仔主廚」。



■楊天宇參加廚藝PK真人騷。